

Sukan Dan Jalinan

Silaturrahim

Oleh : Shahril Anuar Abdul Ghalim & Nurul Nisha Mohd Shah
(Pensyarah Fakulti Komunikasi dan Pengajian Media
UiTM Kampus Rembau)



Sering kita dengar tentang aktiviti kesukanan yang dilaksanakan di semua peringkat dan seolah ianya sesuatu kemestian yang harus ada. Acara atau aktiviti fizikal senantiasa dianjurkan baik pada peringkat awal seperti di sekolah rendah ataupun menengah, mahupun di peringkat pendidikan tinggi sehinggalah berlangsung di sektor awam mahupun sektor swasta. Sukan sentiasa mendapat tempat dalam kalendar aktiviti tahunan dan penganjurannya sentiasa berterusan serta dinanti-nantikan. Dari dahulu sehingga kini, aktiviti sukan kian giat bercambah dengan pengenalan sukan baharu ataupun penambahbaikan format pengadilannya serta cara ia dipertandingkan. Semuanya mengalami perubahan dari masa ke semasa. Dan jika kita perhalusi fungsi dan manfaat sukan juga boleh diujahkan mengikut skop kepentingan. Ianya bukan sahaja bermatlamatkan kesihatan dan mencapai kemenangan bahkan sesuatu yang jauh lebih besar iaitu pembentukan jalinan silaturrahim.

Allah berfirman dalam surah Al-Hujurat ayat 10, yang bermaksud; "Sebenarnya orang yang beriman itu adalah bersaudara..."

Jika kita kupas peranan sukan dalam konteks silaturrahim adalah lebih luas. Bagi negara yang mempunyai kaum yang berbilang budaya, sukan dapat menjadi satu platform untuk menyatukan pendapat ataupun berfungsi sebagai alat integrasi sosial masyarakat. Penyokong atau peminat sesuatu acara sukan yang dipertandingkan akan berkumpul dalam satu kawasan yang sama, pada waktu yang sama. Mereka akan disatukan melalui perbualan atau komunikasi positif seperti perkongsian tentang maklumat sukan dan sebagainya. Tambahan juga perhubungan yang terjalin membolehkan interaksi tanpa ada batas umur, jantina, bangsa mahupun agama. Jalinan komunikasi berteraskan semangat kesukanan ini akan membentuk suatu keadaan yang menyokong kepada wujudnya keharmonian dalam negara. Komunikasi yang berlangsung membolehkan

penyatuan pendapat terbina dalam konteks yang sihat.

Bagaimana pula peranan sukan dalam sesuatu organisasi? Kebanyakan organisasi yang wujud menjadikan acara sukan sebagai acara tahunan sebagai wadah membina semangat kerja berpasukan dan jalinan kekitaan dalam organisasi. Keterlibatan staf atau kakitangan organisasi secara menyeluruh bakal memberi impak positif kepada organisasi. Sukan membuka ruang dan peluang kepada staf untuk mewakili jabatan atau unit masing-masing tanpa mengira kedudukan serta jawatan dalam organisasi. Mereka akan bersama-sama mengetengahkan bakat sukan yang ada dalam menelusuri acara yang telah ditetapkan.

Apabila seseorang individu itu mewakili sesuatu acara sukan peringkat organisasi maka peranannya adalah sama kerana ianya berteraskan kemahiran, kebolehan dan kecenderungan bagi mencapai kemenangan pasukan sebagai pemain. Persefahaman bakal wujud berlandaskan peranan yang dimainkan ketika acara sukan berlangsung. Tak kira acara individu ataupun berkumpulan, mereka akan bersama merancang strategi dan membentuk persefahaman untuk mencipta kemenangan. Sokongan penonton daripada kalangan warga kerja juga menjadikannya suatu proses jalinan kerjasama berpasukan yang mantap. Demi mencapai kemenangan dalam suatu acara, mereka akan melupakan sejenak segala perbezaan yang sering timbul dalam organisasi dan mencari titik persamaan yang wujud demi sebuah kejayaan. Inilah detik permulaan yang baik dalam menyemai silaturrahim antara kakitangan.

Apa yang penting adalah semangat berpasukan dalam acara yang diwakili. Ini merupakan proses yang berkesan dalam membentuk persefahaman di luar konteks pekerjaan atau jawatan. Saling interaksi dan keterlibatan berpandukan bakat dalam acara

sukan ini dapat memupuk semangat kerja berpasukan dan sekaligus mampu diterjemahkan apabila acara sukan berakhir iaitu staf yang terlibat masih mempunyai hubungan di luar bidang kerja yang baik. Pengalaman dan usaha gigih sepanjang acara sukan berlangsung masih berperanan dan membolehkan suasana harmoni wujud dalam organisasi. Usaha ini membolehkan tahap indeks kepuasan di kalangan staf meningkat dan memungkinkan organisasi mencapai matlamat dalam pengurusan sumber manusia. Jalinan silaturrahim yang terjalin ketika acara sukan berlangsung mampu membawa anjakan kerjasama yang erat dalam kalangan staf dalam pengukuhan organisasi. Oleh sebab itu, acara ini dilakukan saban tahun demi untuk mencapai kejayaan organisasi dalam membentuk pasukan kerja yang mantap.

Oleh itu, sudah tentu dalam setiap pertandingan sukan yang dianjurkan pada peringkat organisasi bukanlah sesuatu yang harus dipandang ringan. Objektif utamanya bukanlah untuk mencipta kemenangan dalam sesuatu acara yang dipertandingkan semata-mata tetapi semangat berpasukan dan jalinan silaturrahim adalah menjadi keutamaan. Bersamalah kita mengambil bahagian dalam setiap aktiviti yang dianjurkan oleh organisasi kerana segala kejayaan yang tercipta dalam sesebuah pasukan adalah bermula dengan komunikasi yang terjalin dan silaturrahim yang erat.

Firman Allah dalam Surah an-nisa' ayat 36 yang bermaksud: *"Dan hendaklah kamu beribadah kepada Allah, dan janganlah kamu mempersekutu-Nya dengan suatu apa jua; dan hendaklah kamu berbuat baik kepada kedua-dua ibu bapa dan kaum kerabat, dan anak-anak yatim, dan orang miskin, dan jiran tetangga yang dekat, dan jiran tetangga yang jauh, dan rakan sejawatan, dan orang musafir yang terlantar, dan juga hamba sahaya yang kamu miliki. Sesungguhnya Allah tidak suka kepada orang yang sombong takbur dan membanggakan diri."* (An-Nisa: 36)